

taira tavoo

'esi na ka'anũ araceni na tanasũ mia, 'una ucani koo
pa nimũkũa 'umo'uma. niarapipiningi 'itumuru cũnũ. 'una
kavangvang 'itumuru tariri tiaratũmũ. cũ'ũrũn makai rũmũra.
ka'anũ siapeni taniara, 'una naannakũ mukusa 'inia mapũnũ tariri. sua
niapũnũa tariri ia, usũ'ũn pa kee na tavukua karara. noo kuratumuru cu ia,
umũnũn cu nguani cani cota, cani cota. marikũpũ musũ'ũ na maraa tatia
tapi.

maacaca macangcangarũ kavangvang sua naannakũ. nimũnũa cu
kavangvang taira tavoo. cani cota, cani cota. kuratumuru na tapi. a'unũn
nguani mavici tanasa. noo 'unain tarakananga kincau nukai tangria na
cacanũ. tasira'ũ nguani piratunu movua 'inia. taira tavoo iisua ia,
mata'ũ kavangvang sii canpe niapũnũ. sua niatiuma cau ia, cucuru
macangcangarũ kavangvang. ka'anũ tarasangai sosomanpe! sosomanpe
misee.

tarasangai taniara soni. ruiiri ku ta'ũrũm vankavuka. purusapaniri kumu
kucu. mukusa kavangvang na taira iisua, mapũnũ tariri mavici na tanasa.
miaa tia cu kumakũnũ rovana ia, mangũrũku cani sara tariri. pacũpũngũ, tia
sa'o'o niangũrũ maku. 'urupaca ku 'arating

kutanamũ ti'ingai. mapakacũ mataa matanũkũcũ macaro kũnũn.

ka'anũ sa'o'o, cucuruana pamũmũkũ 'ikua, neni vanai makasia?

neni vanai kacaua cau manmaan kumakũnũ 'inia? mukusa ku akini
tanasa kesoni na cina Na'u. maacaca nguain marivari, "tia mu'uru'uru
pusutavũrũ na canumu macici. masii ara'akia mapakacũ. 'urupacũnũ cu
cũngaa, namnam umangũrũ. makasuin tia cu sa'o'o." 'ahaa! koo
nimaica 'inia, ka'anũ aratũmũ macũrang.

aranai ku na taira iisua, rumaravisi tani tariri. mumũkũ na kukuca
tanasa mia. masini 'esi tanatũnga mia, 'una cu tariri, 'aricang, ravani,
namici, natũngu. ka'anũ ara'akia tavoo nesi, paira apũpũnũn cau, nakai
ka'anũ tarasangai aracũvũcũvũrũ. makasua tantaniara tavacuku kavangvang.
cucuru pakamanũng cũpũngu cũ'ũrũn. kamũcũ makaasua kavangvang
cũpũngu mita, ka'anũ aramarangũ.

aranai miaa mumũkũ ku tariri na tanatũngũa. naira kacaua
rovũvũ kimia kincaucaua. iaavatu parũ'ũna, takacicini rumaravisi ti'ingi
natũngu. makasua macangcangarũ kim, macangcangarũ kavangvang nguani,
manũngana!

(文章大意 僅供參考) ※字數限 200 字

野菜

有塊農地有很多蕨類，婦女們去採摘蕨菜，會先放在腰間的小籃子，之後就一把把的捆綁，集中放置在大的背簍裡。今天是假日，我也去了那塊野地採些蕨菜回家炒，覺得苦苦黏黏的不好吃！Na'u 阿姨說：「要在熱氍燙去苦味，拌青蔥、嫩薑炒就會好吃」。我將蕨菜苗種在後院，如今有了蕨菜、樹豆、山蘇、龍葵等等，菜園裡的蔬菜一直不缺。自從在菜園種植蕨菜後，來訪親友變多，也讓他們拔些蔬菜帶回家。